

იოსებ დავითაშვილის სურათზე

განწირულო, ცხოვრებას
ოცნებანი არჩიე,
ხეზე სჭრიდი ფრინველებს,
ყვავილებს და არშიებს.

სველი ყანა გიყვარდა,
სოფლის სუფთა ღრუბელი,
ბურბუშელის ჩანჩქერი
და ლექსი დამღუპველი.

ლექსი რაღად გინდოდა,
უბედურო ხარატო =
არ იცოდი, ოცნება
ხშირად გულსაც ღალატობს

არ იცოდი. დიდებას
ბევრი ცრემლი სჭირდება=
გადაგჩეხეს, დაგლუპეს,
წითელგულა ჩიტებმა

იალქნების მკერვალი,
ჯეჯილების დარაჯი,
რა ცახცახით დამიწდი
დახეულ სუდარაში

უძეგლო მომღერლებო,
თქვენ სახელს ვინ გამთიშავს.
მტვერიმც მომენატრება
თქვენი ჩოხის კალთისა!